

Fu posto, per li Savii, atento l' orator di la Patria dil Friul se habi dolesto che molti vien trati de qui di la Patria a iudicio contra la parte presa dil 1435 a di ultimo Marzo, per tanto sia preso e *firmiter* ordinà, che alcuna citation vaglii si non per scriti o contratti fati in questa terra etc. E perchè li zudei fanno citar molti de qui dandoli per debitori, sia *etiam* preso che li ditti non possino far citar alcun si non per le cosse contenute di sopra. 98, 11, 19. Fu presa.

Di Sibinicho, fo letere di sier Bernardin da cha' Taiapiera conte. Di certo caso occorso, che una fiera si fa de li el zorno di la Trinità, venendo assa' barche, uno de Histria prese alcuni turchi erano venuti a la fiera *ut in litteris*; qual non fo lete al Pregadi.

El licentiat Pregadi, restò Consejo di X con la Zonta et stetenò pocho; fono sopra le cosse di Dalmatia. Et venuto il Doxe in palazzo, sier Piero da cha' da Pexaro procurator venuto de proveditor zeneral era in tinello per tocharli la man, et Soa Serenità non volse dicendo è contra la soa Promission, e lo fece licentiar.

231 È da saper. In questi zorni, per molti rechiami venuti di rectori di Dalmatia fo deliberato expedir li Sindici zà electi, sier Lunardo Venier et sier Hironimo Querini, et l' altro zorno fo ballotà il mandato in Collegio di ducati 600 per expedirli, *videlicet* ducati 300 per uno; et cussi ozi di danari di le presente occorrentie fono dati, et si partirano per tutto il mexe.

In questo zorno zonse sier Piero da cha' da Pexaro procurator venuto proveditor zeneral di campo, qual era indisposto, et li fo contra da 70 barche. Et non stà in leto ma ha fluxo. Venne con lui sier Lodovico Michiel pagador; *etiam* vene sier Zacaria Barbaro camerlengo di Brexa, ha fato l' officio di Pagador nel campo era in brexana.

Ancora gionse eri el signor Janus di Campofregoso condutier nostro, alozato a san Polo in caxa dil Faytà.

In questa matina, la terra fo piena di una nova venuta per *letere di Otranto, di 26 Mazo* drizate a sier Piero Diedo qu. sier Francesco, che li è scritto esser nova, per navilio partito a di 14 Mazo dil Zante, come hanno di Alexandria Achmat bassà dominar lo Egypto et esser con 60 milia cavalli, et aver butà a fondi e malmenata l' armata turchesca andava in Alexandria per via di Farioni. La qual nova fo, da quelli hanno dato 30 per 100 e manebo, che Achmat dominava, vista e intesa con gran gaudio.

E tra li altri sier Zuan di Prioli qu. sier Piero procurator, qual è di questa opinion et ha dato *ultimate* 10 per 100; ma sier Nicolò Bragadin fo consolo in Alexandria à dato 30 per 100 prima e cussi Calzeran zopello. Quello sarà, se intenderà poi.

Morite in questo zorno maestro Zuan Rota medico, praticava a la Testa d' oro, stato amalato di febre continua zorni 17, et fo sepulto a san Francesco di la Vigna.

A di 7. La matina, non fo alcuna cosa di novo. 232

Del proveditor di l' armada sier Zuan Vituri, date a Corphù, fo letere, di 28 Mazo. Et scrive uno capitolo di questo tenor:

Ancora che tengo certo che la Signoria vostra per via de Constantinopoli et altri lochi sia avisata de li successi di Achmat bassà, che se ha fato signor dil Caiaro e de lo Egypto, non voglio restar di significar quanto ho per uno Christoforo modoneo, habita a Napoli di Romania, el qual se atrovò in Rodi a di 20 April, che zonse l' armada del Turco a Rodi a di sopraditto, mal conditionata per esser stà maltractata da li Farioni de Alexandria; la qual armada si apresentò a di 8 April in Alexandria e ritornò a Rodi discipata come ho ditto. Sichè le vose che sono a queste bande de la Turchia, che g' è stà taià la testa al ditto bassà, non sono vere. Ho volesto far intender a la Sublimità Vostra, ancora che le nove siano vecchie, aziò quella faccia el iudicio che li par *et coetera*.

Ancora scrive el ditto Proveditor zerca quelle occorrentie, et di le galie l' ha et sovenzion li bisogna etc. *Item*, come avisa sier Pier Bragadin nostro baylo zonse a Constantinopoli el di de s. Marco a di 25 April, et ne l' intrar di la galea fo scarichato artellarie per honorarlo.

El intesa questa nova in Rialto che Achmat bassà era vivo, tutti sono di bona voglia, et *maxime* quelli haveano dato danari di la sua vita etc.

Da poi disnar, fo audientia publica di la Signoria.

Noto. L' aviso in le letere dil Proveditor di l' armada zerca il zonzer il nostro Baylo a Constantinopoli, è di questo tenor: Come, per la venuta di una nave patron Manuso da il qual partì a di 11 Mazo di Constantinopoli, dice che 'l di di san Marco, fo a di 25 April, il nostro Baylo, con la galla sotil zonse a Constantinopoli, et fo deserato assà artellarie in segno di alegrezza, che lui senti etc.

In questa matina, essendo stà deliberato mandar uno secretario assegnà a quel baylo per causa con ducati 40 al mexe per spexe,